

"Tres diferente ruta" tristo di hobennan

Mi lo a lesa e manuscrito di e buki aki den un tiro, pero pa motibo di otro cosnan cu mi kier a lesa y otro cosnan cu mi mester a haci, a durami 3 anochi, pa lesa "**Tres diferente Ruta**", e buki nobo skirbi pa Herman "**Manchi**" Hennep.

E buki aki a wordo introduci ayera anochi den Biblioteca Nacional.

Un buki agradable pa lesa, skirbi na un manera simpel cu tur hende por lesa y goza di dje y cu historia di e tres personahenan: **Jeremy, Roy y Rita**. Cada un cu otro vuelta di bida, causa pa situacion familiar y despues droga.

Jeremy a bandona cas despues di tanto biaha cu su tata ta maltrata su mama, y cu den e ultimo biaha aki, el a defende e mama, dal e tata stoel riba cabez, y a bin haya zundra di su mama. El a sinti cu su mama no aprecia cu el a defende e mama, y cu el a ser laga na caya, locual a duel e hopi, te cu el a sali di cas.

E bida cu el a cuminza hiba riba caya, a pone cu el a cay den droga y tabata na caminda di perdicion.

Roy, di un familia "**bon para**" ta un hoben cu a sinta falta di atencion na cas. Su mayornan tabata mas ocupa cu trabao y negoshi, te cu dia cu e tambe a dicidi di bandona cas pa falta di atencion y cariño.

Un hoben inteligente, cu a perde interes pa school. Un joven cu tur cos cu cualquier persona por desea di tin, tabata sinti falta di atencion, y manera ta skirbi den e buki: "**e tabata sinti su mes manera un cacho sin doño**".

E tambe a bandona cas, y cay den perdicion, y debi na amigonan cu el a haya riba caya, el a cay tambe den bida di droga.

E tercer personahe principal di e buki aki ta **Rita**.

Rita ta yiu di **Dora**, kende na edad hoben a haya e yiu pero no por a cria e criatura y a pone na adopcion. **Rita** a wordo adopta pero den e familia e tabata mas bien un "**intruso**" pasobra e mayornan tabata preocupa mas cu nan otro yiunan, cu ta di nan sanger.

Despues cu el a puntra su madrasa di con e ta wordo trata asina, el a bin tende cu su 12 aña di edad cu e no ta nan yiu, y cu e ta adopta pasobra e tempo ey e pareha no tabata tin yiu, pero cu cos a cambia.

Rita a cuminza sinti su mes tristo, bandona y a biba 2 aña soportando e "**bida cruel**", di no ta stima pa esnan cu el a kere ta su mayornan, te cu el a topa cu dos amiga di 1 y 2 aña mas bieu cune y a cuminza sali cu nan y poco poco a cay den bida di perdicion.

Cu su 16 aña di edad, el a cay den droga, den prostitucion, y a bin sali na estado tambe.

E tambe a bin pasa den e bida di mas malo cu un mucha muher

teenager por pasa aden.

Lesando e buki aki, y riparando e rumbo cu tur tres "**teenager**" a tuma den bida, e sufrimento cu nan a trece cune y cu nan tambe a experiencia, ta ponebo sigui lesa, pasobra bo kier haya sa finalmente con a para cu cada un di nan.

E buki ta asina realistico skirbi cu e lector ta haya su mes ta mira e historia manera riba un pantaya, mientras e ta lesa.

Mi ta sigur cu cada persona, cada mayor, cada hoben, cu dicidi di cuminza lesa e buki aki, lo no pone abao te cu nan yega e final.

Esaki ta solamente tres caso di e tantisimo cu tin riba nos isla, tres caso cu ta mostra e diferente maneranan cu nos hobennan por cay den mundo di droga y cay den adiccion.

Lesando e buki aki, tanto mayornan como e hobennan mes por haya informacion pa preveni di bin den contacto cu droga y con tambe por sali di e situacionnan aki.

Ta trata aki di un buki hopi bunita, hopi educativo y informativo y cu bo ta lesa cu hopi placer.

Riba esaki mi por bisa tambe cu a bira tempo pa nos pone mas atencion riba bukinan skirbi pa nos propio hendenan. Bukinan skirbi na papiamento.

Ta nos mester duna sosten na nos autornan, cumprando e bukinan, y asina stimula tambe mas skirbimento di buki den nos propio idioma.

Cada buki, di cada autor di nos isla, ta otro experiencia y lesando e variacion aki, bo ta haya admiracion pa cada un di nos escritoman. Ta hopi tempo, sacrificio y gasto ta bay den e publicacionnan aki, y ta bon mes cu nos tin un **Charuba**, un **UNOCA**, un **Prins Bernhardfonds**, cu ta sostene nos autornan y casnan comercial cu ta duna un contribucion grandi, manera e caso di "**Tres Diferente Ruta**" cu a haya sosten di **Garage Cordia, Lions Club, Caribeean Mercantile Bank, BJ Arends and Sons, Amsterdam Manor y Casa del Mar** pa **Manchi** por a logra e publicacion sumamente bunita aki.

Kende ta **Manchi**? Pa esnan cu no sa kende ta Herman "**Manchi**" Hennep, lagami duna e splicacion di mas facil y hopi lo bisa: "**Mi sa ta ken!**"

Esey ta e persona den rolstoel, cu nos ta mira den cayanan di Playa, cu su señora ta pusha e rolstoel, durante nan paseonan pa haci compra etc.

Tur dos semper cu un sonrisa riba cara y personahenan masha agradable pa anda cu nan.

Manchi pabien! "**Bo a bolbe habri mi wowo**" pa problemanan di nos familiaran y di nos hubentud, Danki!

Juby Naar.